

UORDEN DA SCOULA DA LA VSCHINAUNCHA DA ZUOZ

As basand sülla constituziun cumünela da Zuoz dals 8 december 2010 e sün l'artichel 20 da la ledscha davart las scoulas populeras dal chantun Grischun dals 21 marz 2012 decretescha la vschinauncha da Zuoz il seguaint uorden da scoula:

I. DISPUSIZIUNS GENERELAS

Art. 1 Böt

La scoula publica sustegna ils genituors tar l'educaziun dals iffaunts per promover ün saun svilup spiertel, mentel, culturel, linguistic e corporel. Ella promouva il güdicher cun saun inclet, las forzas creativas e'l savair dals iffaunts. Ella svaglia l'interess e l'incletta pels conumauns e l'ambiant e güda a furmer sün basa cristiauna personas independentas e consciantas da lur respunsabilitad invers la generalited.

Art. 2 Equalited da las schlattas

Denominaziuns da personas, funcziuns e professiuns in quist uorden as refereschon sün tuottas duos schlattas, per quaut cha nu resulta ünguott'oter dal sen da la constituziun.

Art. 3 Organisaziun

¹ La vschinauncha da Zuoz maina la scoulina cun duos classas e'l s-chelin da scoula primara cun 6 classas.

² Il s-chelin ot cun scoula reela e scoula secundara vain mno dal consorzi da scoula "La Plaiv Suot Funtauna Merla" (SFM), al quël fo part eir Zuoz. La Plaiv SFM regla la gestiun da quistas scoulas in tschantamaints correspundents.

³ La vschinauncha da Zuoz po as participar ad üna scoula da pedagogia curativa segund contrat speciel.

Art. 4 Collavuraziun cun Madulain

Ils scolars da la vschinauncha da Madulain frequentan las scoulas da Zuoz a basa d'üna cunvegna traunter las duos vschinaunchas. Quista es d'adatter mincha 3 ans a las exigenzas dal temp.

Art. 5 Consorzis

Cun la mera d'optimer la scoula e da raziunaliser la gestiun po la vschinauncha s'unir ad ün consorzi chi ho il böt d'organiser u eventuelmaing eir mner scoulas specielas

Art. 6 Lingua d'instrucziun

La lingua d'instrucziun scritta e discurreda es il rumauntsch puter. La vschinauncha sustegna la traducziun da mezs d'instrucziun in rumauntsch puter.

Art. 7 Düreda

¹ La düreda da l'an da scoula vain fixeda dal cussagl da scoula a basa da la ledscha davart las scoulas populeras dal chantun Grischun.

² Tenor cunvegna ed in coordinaziun culs cussagls da scoula da la regiun decida il cussagl da scoula davart il plan d'instrucziun e da vacanzas. Da Nadel e da prümavaira es da fixer almain ün'eivna da vacanzas. Vacanzas nu paun surpasser desch eivnas in fila. Il temp d'instrucziun düra minch'eivna tschinch dis, da lündeschdi fin venderdi.

³ La partecipaziun al Chalandamarz ed al Bös-chin es obligatorica.

Art. 8 Temp d'instrucziun

¹ Il cussagl da scoula fixescha ils temps d'instrucziun da mincha di confuorm a las ordinaziuns da la ledscha davart las scoulas populeras dal chantun Grischun.

² Il temp d'instrucziun da minch'eivna as drizza zieva las ordinaziuns da la ledscha davart la scoula populera dal chantun Grischun.

Art. 9 Absenzas

Il cussagl da scoula regla l'uorden da las absenzas.

Art. 10 Oblig d'ir a scoula, lö da scoula, instrucziun gratuita

L'oblig d'ir a scoula, il lö da scoula scu eir l'instrucziun gratuita as drizzan tenor il dret chantunel.

Art. 11 Uras da bloc

La vschinauncha garantescha las uras da bloc prescrittas dal chantun sül s-chelin da scoulina e sül s-chelin primar.

Art. 12 Structuras da di

La spüerta da las structuradas da di as drizza tenor la ledscha davart las scoulas populeras dal chantun Grischun.

Art. 13 Ulteriuras spüertas

¹ In cas da bsögn po la vschinauncha s-chaffir ulteriuras spüertas scu p. ex. lavur sociela u spüertas da Time-out.

² In cas da bsögn vegnan creadas spüertas specielas per scolars cun talents particulers.

Art. 14 Imsüras da pedagogia speciela simpla

La vschinauncha es cumpetenta per la dispusiziun e realisaziun da las imsüras da pedagogia speciela simpla.

Art. 15 Taxaziun, promoziun ed admissiun

La taxaziun scu eir la promoziun e l'admissiun dals scolars succeda tenor dret chantunel.

Art. 16 Visitas da meidi da scoula e chüra da daints

Las controllas obligatoricas tal meidi e daintist da scoula vegnan pajedas da la vschinauncha. La vschinauncha as partecipescha als cuosts da trattamaint dals daints.

Art. 17 Localiteds

La vschinauncha da Zuoz metta a dispusiziun a las scoulas las localiteds vulidas e pissera per lur mantegnimaint. Respunsabel pel mantegnimaint es il cussagl cumünel.

II. IL CUSSAGL DA SCOULA

Art. 18 Cumposiziun

Il cussagl da scoula as cumpuona dad 1 commember effectiv per Zuoz, impü 1 commember effectiv per la vschinauncha da Madulain. Ultra da que es il depüto dal decasteri "educaziun" dal cussagl cumünel da Zuoz commember d'uffizi e surpiglia il presidi dal cussagl da scoula.

Art. 19 Elecziun

Confuorm a l'art. 49 da la constituziun vain elet il commember dal cussagl da scoula da Zuoz illas tschernas da Chalandamarz per ün trienni ed aintra in carica sülla fin da l'an scolastic. El vain remunerero seguond il reglamaint da salarisaziun dals funcziunaris cumünels.

Art. 20 Düreda d'uffizi

Il commember dal cussagl da scoula da Zuoz es reelegibel, ma na per dapü cu trais triennis. Las dispusiziuns da la constituziun cumünela velan eir per la cumposiziun dal cussagl da scoula.

Art. 21 Constituziun, Lingua

Il cussagl da scoula as constituescha s vess. Las tschantedas dal cussagl da scoula dessan gnir mnedas in lingua rumauntscha, confuorm a l'art. 6 da la constituziun.

Art. 22 Organisations

¹ Il cussagl da scola vain convocho tres il president dal cussagl da scola e que uschè suvenz scu cha'ls affers pretendan quetaunt. Sün giavüsch da duos cusgliers u dal mneder da scola es il president oblio da convocher üna radunanza extraordinaria.

² A las tschantedas dal cussagl da scola piglia part per regla il mneder u ün rapreschantant da la magistraglia. El ho vusch consultativa e cumpilescha il protocol da las trattativas.

Art. 23 Abilitad da decider

Il cussagl da scola po trer decisiuns be scha sun preschaints almain duos commembers. In cas da parited da vuschs decida il president dal cussagl da scola.

Art. 24 Dovairs e cumpetenzas

La survagliaunza da la scola es affidada al cussagl da scola, confuorm a la ledscha davart las scoulas populeras dal chantun Grischun. El accumplescha tuot ils dovairs sül champ scolastic, scha quels nu suottastaun ad ün'otra instanza confuorm a quist uorden da scola e l'uorden da disciplina. Cul böt da promover üna gestiun optimela da l'instrucziun e da las activiteds in scola sun que, observand il büdschet aderieu, spzielmaing:

1. Promouwer la collavuraziun traunter la scola e'ls genituors.
2. Appruver ils uraris da scola e'ls arrandschamaints da scola e da sport sün proposta dal mneder.
3. Appruver congedis per la magistraglia in cas da conferenzas, cuors ed occupaziuns our d'servezzan scu eir occupaziuns secundaras.
4. Confermer substituziuns per magisters in cas dad absenzas da pü lungia düreda.
5. Conceder congedis per scolars tenor uorden d'absenzas.
6. Tratter cas disciplinars pü agravants u criminels seguond l'uorden da disciplina cumünel e chastier absenzas da scola seguond l'artichel 55 da la ledscha davart las scoulas populeras dal chantun Grischun.
7. Preparer d'an in an il preventiv per las scoulas e suottametter quel al cussagl cumünel per l'integraziun i'l büdschet cumünel. A regard spaisas extraordinarias ho il cussagl da scola la cumpetenzza fin a frs. 2'000.-- per cas in üna seduta u fr. 4'000.-- in duos sedutas, però maximelmaing frs. 10'000.-- l'an. La gestiun finanzia e l'intera contabilitad chi concerna las scoulas sto illa cumpetenzza da l'administraziun cumünela.
8. Appruver la spartiziun e l'attribuziun da classas tenor proposta dal mneder.
9. Survaglier la promoziun linguistica illa lingua d'instrucziun per iffaunts da lingua estra.
10. Survaglier l'integraziun d'iffaunts cun impedimaints i'l sistem da scola e scoulina dal chantun Grischun.
11. Permetter imsüras per promover iffaunts suotdumandos. Impü po il cussagl da scola suottametter propostas per mauns dal cussagl cumünel per persunas adattedas chi daun sustegn a tels iffaunts.
12. Appruver mezs d'instrucziun, impustüt in connex cun l'adöver excepziunel da mezs d'instrucziun in rumauntsch grischun.

13. Il cussagl da scoula po deleger singuls da quists dovairs ad ün mneder da scoula. Tuot la respunsabilitèd resta però i'l dovair dal cussagl da scoula. Il quadern da dovairs respectiv stu gnir approvo dal cussagl da scoula per mauns dal cussagl cumünel. Il cussagl da scoula fo la proposta per mauns dal cussagl cumünel a regard la tscherna dal mneder da scoula.
14. Visitas in scoula d'uraunt l'an scolastic sun giavüschedas, impustüt sün proposta dal mneder da scoula.

Art. 25 President dal cussagl da scoula

¹ Il president dal cussagl da scoula ho impustüt ils seguaints dovairs e las seguaintas cumpetenzas:

1. el rapreschainta il cussagl da scoula
2. el survaglia:
 - a) al cumanzamaint da l'an da scoula la spartiziun da las classas tenor las decisiuns dal cussagl da scoula;
 - b) l'intera gestiun da scoula, impustüt l'observaziun da l'urari e da las uras d'instrucziun;
3. el executescha l'examinaziun da cas disciplinars;
4. el prepara las fatschendas dal cussagl da scoula e pissera per l'execuziun da las decisiuns trattas.

² Il president dal cussagl da scoula po trer decisiuns in cas urgiants. La decisiun tratta stu però gnir aderida definitivmaing dal cussagl da scoula, scha pussibel illa prosma tschanteda.

Art. 26 Tschernas magisters

Il cussagl da scoula, insembel cul respunsabel pel persunel da la vschinauncha, fo propostas per mauns dal cussagl cumünel per tscherner, licenzcher ed approver magistras e magisters (art. 51 da la constituziun cumünela).

Art. 27 Organisaziun, uraris, uordens, reglamaints

Per tratter dumandas chi resguardan la müdeda da l'organisaziun scolastica, l'introducziun da novs geners da scoula u ils uraris scu eir per decreter uordens speciels (per exaimpel: uorden da disciplina, uorden da chesa da scoula e reglamaint d'adöver pels implaunts da scoula) stu il cussagl da scoula consulter il cussagl cumünel e la magistraglia. Ils magisters paun gnir invidos a las tschantedas. Els haun vusch consultativa.

Art. 28 Structura da gestiun

¹ Resguardand la chüra optimela e la promoziun linguistica divergescha in quist uorden la structura da gestiun da la ledscha chantunela. Las classas vegnan per regla spartidas tenor il seguaint princip:

1. Per classas singulas s'amunta la cifra da scolars maximela a 24 iffaunts;
2. Classas singulas cun pü poch cu 15 scolars sun dad eviter. Classas suot 10 scolars sun da fusiuner.

3. Classas fusiunedas nu dessan cumpiglier dapü cu 18 scolars.
4. A dessan gnir fusiunedas be classas interas.

A paun gnir fattas excepziuns tar la spartiziun pustüt in cas da classas na omogenas e pretensiusas u in cas da problems finanziaels da la vschinauncha.

² La scoula primara dispuona d'ün mneder da scoula chi'd es la persuna da contact traunter la magistraglia e'l cussagl da scoula e chi ho la cumpetenzza e l'oblig d'exeguir las lezchas surdedas seguond il quadern da dovairs. Quist quadern da dovairs fuorma üna part integrela dal contrat da servezzan individuel.

III. ILS MAGISTERS

Art. 29 Impiego

Ils magisters tschernieus dvaintan funcziunaris da la vschinauncha. Lur dovairs in quista funcziun sun specificchos illa ledscha davart las scoulas populeras dal chantun Grischun. L'uorden chantunel davart la salarisaziun dals magisters fuorma üna part integrela dal contrat da servezzan individuel. Per occupaziuns secundaras es da drizzer la dumanda al cussagl da scoula.

Art. 30 Salari

La remuneraziun dals magisters as basa sün las normas respectivas da la ledscha davart las scoulas populeras dal chantun Grischun. Eventuelas müdedas da la düreda da l'an da scoula sun da resguarder. La vschinauncha da Zuoz as resalva da decreter ün egen uorden da persunel. Quel valess eir per la magistraglia.

Art. 31 Dovairs

La magistraglia fuorma ün collegi chi vain rapreschanto tres il mneder da scoula invers las autoriteds. La magistraglia, insembel cul cussagl da scoula, sustegna ils genituors ill'educaziun dals iffaunts, confuorm a l'art. 1. La magistraglia visescha tuot ils quints da spaisas per mauns dal president dal cussagl.

IV. GENITUORS E SCOLARS

Art. 32 Düreda da la scoula

L'oblig da frequenter la scoula es definieu tenor la ledscha davart las scoulas populeras dal chantun Grischun correspondentia.

Art. 33 Disciplina

Ils genituors sun respunsabels cha lur iffaunts frequentan regulermaing l'instrucziun ed as suottamettan a las dispusiziuns da l'uorden da disciplina.

V. SGÜRAUNZAS E PROVEDIMAINI SOCIALI

Art. 34 Sgüraunzas

La vschinauncha stipulescha las sgüraunzas prescrittas per scolars e magisters confuorm a la ledscha davart las scoulas populeras dal chantun Grischun. La vschinauncha es autoriseda da stipuler eir otras sgüraunzas chi dvaintan necessarias.

Art. 35 Meidi, daintist, psicolog, logoped

Il servezzan da meidi scolastic, la chüra da daints scu eir il servezzan da consultaziun psicologica e logopedica sun d'organiser confuorm a las prescripziuns federelas e chantunelas. Il cussagl da scoula es respunsabel, cha las dispusiziuns in merit vegnan executadas in perfet uorden ed ho da numner il meidi ed il daintist da scoula. A velan las dispusiziuns dal contrat regiunel per la logopedia e legastenia, eui. (in vigur daspö ils 1. settember 1989) scu eir quellas dal reglamaint cumünel per la chüra dals daints.

VI. DISPUSIZIUNS FINELAS

Art. 36 Via güdiciela

¹ Cunter dispusiziuns e decisiuns da las personas d'instrucziun, dal mneder da scoula e dal president dal cussagl da scoula in fats da scoula po gnir fat recuors infra 10 dis al cussagl da scoula.

² Cunter dispusiziuns e decisiuns dal cussagl da scoula in fats da scoula po gnir fat recuors infra 10 dis al Departamaint d'educaziun, cultura e protecziun da l'ambient, premiss cha la ledscha davart las scoulas populeras dal chantun Grischun nu determinescha ünguott'oter.

³ Cunter decisiuns d'attribuziun negativas e dispusiziuns concernent na-promoziun resp. promoziun po gnir fat recuors infra 10 dis a l'uffizi per la scoula populera e'l sport. L'uffizi po prevzair üna procedura speciela per taxer ils recuors.

Art. 37 Dret subsidiar

Per tuot las dumandas chi nu sun regledas in quist uorden da scoula velan la ledscha davart las scoulas populeras dal chantun Grischun e las ulteriuras ledschas surordinadas.

Art. 38 Entrer in vigur

Quist uorden da scoula rimplazza l'uorden da scoula dals 3 avuost 2011 ed aintra in vigur tres decisiun da la radunanza cumünela e cun l'approvaziun tres il Departamaint d'educaziun, cultura e protecziun da l'ambient dal chantun Grischun.

La radunanza cumünela dals 26 november 2014 ho decreto quist uorden.

Per la vschinauncha da Zuoz:

.....

.....

Il president:

.....
Flurin Wieser

L'actuar

.....
Claudio Duschletta